


He Whakatau

Me mātua pānui kia marama rawa koe i ngā whārangi 8–14 o tēnei pukapuka.



He whakarāpopoto

Pānuihia te whakarāpopoto ki te ākonga. Kua pā anō te tokomauri ki a koe? E hika mā, i aha koe? He aha hoki ngā mahi a te whānau kia pai ai te tokomauri o Rihari?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Kua pā anō tētahi reo ohore, reo whakamā ki a koe? I pēhea ngā whakaaro o Rihari i te wā i pā te tokomauri ki a ia me te kore hoki e tere te mutu. He aha tā te whānau hei āwhina i a Rihari? Kua whakamahia e koe tētahi o ngā rongoā a te whānau, otirā, he rongoa ake tāu hei whakamutu i te oro tokomauri.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e marama ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini whitireo, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha a Whāea Peta i pukuriri ai?
2. Kōrerohia mai kia rua o ngā tohutohu hei āwhina i te tokomauri.
3. Nā Māmā i aha i mutu ai te tokomauri o Rihari?
4. Kua pā anō te tokomauri ki a koe, ā, nā te aha i mutu ai?
5. Mēnā ko koe te kaiwhakatika i te tokomauri he aha tōu rongoā?

Ngā whakautu ki ngā whakapuaki māramatanga

1. I kata katoa ngā ākonga.
2. Ka inu wai, kia ngote i tōna hau, i tū ki runga i tana māhunga.
3. I whakaohore i a ia.
4. He maha ngā whakautu rerekē.
5. He maha ngā whakautu rerekē.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuatanga o te pukapuka nei.

Te pūtaka

T Kia tipako, kia whakamahi i ētahi rerenga i roto i tētahi momo tuhituhi.

He whakatakinga ā-roto, he whakaharatau

Kia whanake ai te marama o te ākonga ki ētahi rerenga whakaatu tūmahi, me matapaki rawa te takoto me te whakamahi o aua rerenga. I mua i te pānuitanga a te ākonga me matapaki kōrua i tētahi anga pai hei whakaatu i ngā rerenga tūmahi kia kitea ai te ātaahua i roto i tētahi rotarota katakata. Me tauira tētahi rotarota mai te akomanga kia kite ai te ākonga i ngā wāhanga, te tapanga, te kaupapa, te tauwhāinga, te piki o te puehu, te whakatau, heoi, ko te tino rerekē o te rotarota he tuhi ā-whiti kē. Tērā kotahi, neke atu rānei te maha o ngā whiti, engari ka kawea haere tonu ngā whiti i te kaupapa.

Hei tauira (wh. 2):

I hāmama tana waha ki te whakahoki pātai engari kotahi anake te mea i puta, ko te TOKOMAURI!

*Hāmama tana waha,
kotahi te putanga,
AUĒ! TOKOMAURI E!*